

律



月峰先生居業次編卷之五目錄

墓誌銘

南京禮部尚書進階資善大夫贈太子少保泗  
橋陶公墓誌銘

南京工部尚書簡菴陳公墓誌銘

南京都察院右都御史玉陽沈公墓誌銘

文林郎浙江道監察御史雷公國柱暨配兩韓

孺人合葬墓誌銘

通議大夫廣西等處提刑按察司按察使楊公

墓誌銘



廣東按察司副使嵩巖張公墓誌銘

湖廣布政使司右叅議雲龍蔣公墓誌銘

中憲大夫河南彰德府知府史公墓誌銘

石阡知府岱陽呂公暨配謝恭人合葬墓誌

銘

廣西按察司副使錢公配嚴恭人墓誌銘

于配周張兩孺人墓誌銘

月峰先生居業次編卷之五

餘姚孫

鑛文融著

門人

呂胤筠美箭

校梓

南京禮部尚書進階資善大夫贈太子少保泗

橋陶公墓誌銘

夫吾郡泗橋陶公者豈非古之所謂大臣者哉今雖  
登上卿乃竟未獲展其概徒猶以治郡稱則余有憤  
歎者焉公諱承學字子述嘉靖丁未進士授中書舍  
人庚戌選南京湖廣道御史是時咸寧侯仇鸞為大  
將軍飾詐蓄姦外挾虜為重上甚任之鸞日以肆



大臣與忤者。類得竒禍。公疏劾之。奏上。曰。天子方  
函珍食。賜鸞家。而疏留不下。家人甚憂焉。已乃報聞。  
明年鸞竟敗。人以其是重公。巡下江。又巡鳳陽。倉所至。  
肅然。墨吏歛迹。丙辰出爲徽州知府。徽故山郡。持籌  
者徧四方。萬金之家比比是。其民負氣好爭。以善訟  
爲豪。久者至歷數十歲。而相告言。獄辭滿篋。猶不止。  
平居不肯輕出一錢。富而益甚。至賄獄則破家不惜。  
且輕視官府。以爲吾貨足取之也。訟不在大。卽口語  
有爭。輒起訟。訟輒以殺人爲辭。勝者戚里皆賀。負者  
杜門憤恨。無地自容矣。然或賀者在門。訟者在途。以

此牽連不已。公不厲聲色。大事律斷。小事情宥。諸爲  
間者。投賄者。假權勢請託者。造蜚語者。曲訴上官者。  
壹切不問。中情律而止。於是訟師技窮。猾魁氣折。望  
公門而心悔者衆矣。特迫於習俗。未能頓已耳。公已  
乃察其朴直。不詭飾者。稍婉誘教之。庭質時。面諭曰。  
聞子鄉尚氣。夫理直而不求自白。隱然勝矣。今蒲伏  
於庭。僥倖毫釐之伸。卽伸其羸。與有幾及。今中已猶  
可得半則息者。十五。又曰。此纖微耳。何煩公府姑歸。  
與父老議之。不平更來。則退者十九。訟殺人者必先  
與約曰。此非汝父卽汝兄。不亦皆手足戚。非有沉寃



而戮其腐骨卽當與殺者同律令具服辭乃爲驗之  
不得實卽重坐蓋法一二人迄公在無敢誣殺人者  
敏於決斷無宿案下邑民就讞者止春半升糧因號  
曰半升太守月再授狀初至日數百人二年後則不  
過數人有時或竟無一人郡前食肆俱罷衢市寂如  
非復嚮之偶語肩摩朋飲薨接矣士夫時見無敢以  
私請幣物絕不至門或說曰太峻矣公曰彼自無求  
安用拒自無餽安用辭人不信以詢之徽人則曰果  
也夫必不聽奚囑也必不受奚餽也 三殿災採木  
使者來以徽多木商將以巨木若干額賦之公聞則

治席郊迎盛慰勞用悅其意而令父老訴之徐曰商  
者販木於外耳郡非產木也今若責郡出木則無從  
出若令商自所在供之第卽數木以賦胡問徽也今  
願輸千金直如何部使大悅公卽以庫羨具直島夷  
擾東南兼之山寇上江諸郡數有大徭公以顧役意  
行之如巨木直役竟而民不知或之旁郡見其疲于  
兵甲乃驚曰吾郡何獨無此歸更相質問乃知之因  
相語泣下徽人相矜以行賈賈或數十年不歸前此  
郡守惡其輕離家因重稅難之給傳人二金公白損  
之令止出一鏹迄今爲例庚申擢江西按察副使兵



備九江瀕行郡人擁門頓首曰明府今去笥中無一  
敝土物敝土慚矣扇墨服用物也又價廉歸以遺鄉  
人可乎公再三辭謝已乃取墨一笏扇一握受之景  
藩就封沂江入楚牽舟者殆不下十萬人徽奉檄當  
以萬人逆于江公時已去郡乃謂監司曰 帝子遠  
出諸郡宜協力第徽郡去江且千里今萬人客居江  
濱設王舟不卽來安所寄食倘有逋逃卒召之寔難  
若取直于徽募人于江貧者得直居者安堵不亦便  
乎監司以爲然遂收直罷徽役省費數萬公至九江  
景藩亦適至前此諸宦寺多執所過長吏羈之舟中

必重金贖乃得出於是彭澤令亦被執公乃以檄數  
令怠緩罪若將徵來訊鞫之令遂脫歸贛賊戕汪副  
使破玉山縣江西大擾公治兵湖口扼之適有事安  
慶還至黃石磯與賊魁袁三遇麾水兵進賊射斷我  
帆公舟幾覆益鼓衆薄之亦射斷賊帆遂斬袁三盡  
殲其衆 賜白金若干癸亥遷湖廣叅政分守澧州  
甲子晉福建按察使丁母憂隆慶丁卯起補雲南未  
行復丁父憂庚午補廣東旋擢山東右布政使時新  
鄭當國欲爲鄉人擇賢牧伯遂擢公河南左使河南  
藩封衆祿多後時久者或遂不與公盡給以時謹權



衡出入如一尤嚴飭諸吏惓惓於拊循蒸黎去蠹無  
吝郡邑吏惕然畏憚之壬申召爲太僕卿堂掾以羨  
金請叱之去前此爲守廵自常祿外卽傳金亦不受  
自取蔬肉而已九江時所積至數百則以繕治郡城  
郡人勒石記焉抵京一日遷應天府尹萬曆癸酉轉  
南大理卿甲戌改北公爲人凝靜寡言笑平居竟日  
端坐接人或不交談余時以鄉里後進謁公或旅進  
或獨見必有請乃得片言半語不則默寒溫者領之  
而已淵乎莫測其涯也無何晉工部右侍郎丙子改  
刑部尋轉左江陵相尚綜核爲治其意欲以勤吏職

齊天下凡工言論鼓聲名者多所不取名曰務實大  
約祖法家之意與公爲同年友雅敬重公見公寡言  
而勵精以爲與其意合深望助力公署刑部印聽獄  
精審小大必以情尤歎服以爲兼材戊寅遷南京禮  
部尚書會刑部尚書吳公百朋請老寓書政府舉公  
自代時相亦深注意焉或以告公曰姑遲遲行當卽  
留此也公聞之遂速發是時楚相方有不持父服之  
事疑天下皆謗已尤疑正人慮或反戈向之其楚客  
入相幕者以相素厚公特忌之甚公行後遂中以浸  
潤若云陰爲諸橫議者主相以已注向頗切惟公不



伸私款方狐疑聞其言遂信又南給事中傳某者楚人也挾相勢自恣相亦託以耳目傾南都皆折節下之候者盈于衢或拒弗見公不爲加禮公攝工部傳受商人金數爲請在禮部治虎隸沈鉞罪傳又爲乞命皆不聽傳大不堪遂讒公於相曰每事輒爲異議會核諸司經費諸逢時相意者爭爲相減冀博尚儉名新官至或不設席第私攜榼聚飲公意非之上疏言臣禮官也惜費失禮不可請益之時相不喜益以傳言爲然京察先一年冬傳以考績至京見楚相益短公商大理爲正者公姻家也時爲御史凡京察後

臺諫例有糾拾䟽所刺事輒用赫蹠書之名曰訪單至期各出單衆共評之傳過商公出一單袖中則公銜名也據有數事曰得諸南中意若挾商者商知其意不應惶而已是時楚相勢已成臺諫䟽不請不敢上辛巳春諸公往見相出應劭者姓名則曰何無陶某或對曰陶公清德素聞相曰今九卿孰非清者應者曰難寘辭耳數日內自陳䟽當來以旨罷之何如相厲聲曰不能待因出赫蹠曰第膽入卽傳袖中單也公遂致政歸歸八年天子採大臣言修先朝養老故事凡二品家居有宿望者月給米三石歲



輿夫四名公與焉撫按薦疏凡七上四海皆想望公復出而公毅然不可奪矣靜默自適自少至老如一日然不厭人語瑣猥雜陳聽之無忤未第時嘗授經會城有何生者素嚴公謀狎侮之匿伎寘酒延公比至鐫戶出諸幕公凝然如常時伎單僊于戲笑而視之若無無幾微動詰朝竟不一言及友乃大服居官所積俸歸悉以納諸伯氏所居惟樓三椽猶與季氏布政公共之子息旣衆則藩屏以居終身不增一室蔬食常不繼或採菱或摘野菜豈惟無肉初時負債甚多里中少年或非之曰部民鄉人皆財也公嚴於

部民而通于鄉人豈曰能廉然竟皆償之或問曰人皆欲富公獨異何也公曰非然也吾慙於吏卒吾手軟而面薄平生耻言宦跡晚年時或問疏劾咸寧事公良久曰有是乎予忘之矣又問卽不答在徽時下邑人往往爲位書公爵里祀于家及去乃相率立祠于郡郭寘田供祀久之益思慕過者必拜春秋祝釐於祠大會飲胙寃者輒走愬或禱卜焉其賈四方者遇吾郡人必問公眠食狀若何子編修望齡嘗一至徽居人爭出觀之所過塞路曰此吾父兒邪父老有泣下者族子適楚日暮無所止遇徽賈相問遽曰君



越人豈識吾陶父乎曰余伯父也遂邀入宿盛具款接之今聞訃則皆悲歎相告或詣祠哭宦在京者聞請卹疏上則相率之所司頌公烈焉嗟乎昔黃頴川位至宰相然猶以治郡稱彼器誠有極也孔子曰才難謂公輔之材耳若吾泗橋公者蓋庶幾焉今制非翰林不居鼎足宰輔無論假令公得歷六卿或總內臺操尺寸之柄必當使疵政清囂論息化窳而爲良毀雕而返朴然今已矣公居官雖逾三十年藩臬佐不得代帥受名公又務自晦南宗伯官雖尊不與邦禮其餘官俱不久是以惟中州以庶稱新安以循

良稱新安更久且又於民親故民愛戴之尤深嗚呼公豈徒郡守器哉魏高平杜大夫蕭太傅皆常典郡有名史不耀其績以所就者大耳假使公得究洪業卽徽績雖異靡稱矣卽今公他治行皆爲徽所掩是已以用未究故特用二千石顯焉不亦惜乎以余目所覩若鄞聞莊簡吉水周簡肅其規模與公亦略相似然莊簡爲冢宰簡肅爲御史大夫猶爲一遇惟公則獨扼於相也悲夫公生正德戊寅正月十八日卒萬曆戊戌六月三日享年八十有一 詔贈太子少保 賜祭二壇遣行人某治喪公父曰庸齋公諱廷



奎京衛武學訓導敦實行著正學演說沒祀於學宮  
祖父曰方塘公諱試鎮江府學訓導好學食貧後皆  
贈工部右侍郎母商祖母馬皆贈淑人俱有誌銘言  
其先自台州徙不詳何邑初居紹興府後徙今居在  
城東四十里曰陶家堰隸會稽初徙者曰幸五幸五  
奎仲濂仲濂生仕初生璇璇生懷四世皆以儒  
隱宗人重之懷卽公會祖父也公元配王贈淑人繼  
室董初封淑人望齡史職蒲進公資善大夫董爲夫  
人男五人長與齡舉人娶應天府尹陳公絳女繼娶  
庠生李公尚謨女元月黃叅議潘公清亶女

次卽望齡己丑會試第一及第第三翰林編修娶大  
理少卿商公爲正女次奭齡舉人娶江西右布政使  
張公一坤女次祖齡聘中書舍人王公應吉女與齡  
益齡元公卒女四人長適禮部尚書諸公大綬子  
鴻臚元高安次適淮安府知府范公櫝子博次適  
庠生元祖慶子庠生懋史次適長蘆運使何公繼  
高子庠生光道與齡及女二人王淑人出餘俱董夫  
人出孫男二人履中娶鴻臚序班何公汝成女與齡  
出履平尚幼奭齡出孫女二人適兵馬副指揮章公  
弘瑞子監生立陞文選郎中朱公敬循子庠生調元



俱與齡出望齡等以萬曆九年八月日葬公于  
先是王淑人卒已葬項里山今上遣官葬公履中  
乃請於朝徙與公合焉銘曰  
鵬鶚累百不如一鸞純德無言衆智讓全成蹊新都  
乃得其物金石于黎尸祝于郭臺有黃矢藩之湛水  
神劍在匣其光有煒禮典未和乃中于毀維天產材  
帝則賴賢和玉弗瑀厥質愈完完歸于天民食者  
庶民有企德公何失德莫言匪默窺石斯勒

南京工部尚書簡菴陳公墓誌銘

餘姚眉山之陳相傳爲江左陳帝裔隋平江左陳諸  
宗分散或流寓上虞已徙餘姚夏少畝有陳悅者仕  
爲常侍歷四百餘年世系莫考至宋宣和建炎間陳  
升以禦寇功授武功大夫其孫臯乃遷眉山云尚書  
公諱雍字希冉號簡菴父諱頤封工部主事贈工部  
右侍郎兼都察院左僉都御史祖父諱信贈官與父  
同曾祖父諱安善又上三世元督運副使曾久又二  
世卽臯也公登成化甲辰進士弘治改元授工部主  
事轄修通州倉及磚廠廠去河遠納磚者不便乃移



置木次又舊磚止隨到報數駟會或私買營利莫之  
察也以是歲額常缺公乃立例兩月一覈實又移取  
儀真臨清兩廠報冊與收簿對缺者按原發數根究  
主名責之償仍募令首納不一年宿逋悉完自是廠  
中政清無負一磚者績滿以明法比改刑部主事與  
修問刑條例遷署員外郎斷馬回子大獄名益起尚  
書白公昂甚重之滿六年實授又二年遷湖廣僉事  
初公祖父贈公嘗以浙掾滿改保定蠡掾後赴京卒  
妾吳及幹僕故力弗能還遂扶柩歸蠡殯叢祠側敬  
死子彙移塋留新莊歷五十年無音問公進士歸省

時往來兩過蠡訪之不能得彙亦不知何往會公曰  
年友何琛知蠡公託之而敬有甥李檀爲縣隸吳亦  
有甥王強因檀問強遂得墓所又出敬所藏贈公曩  
自姚赴京時所齎傳及故友徐祖律與敬二札以爲  
驗何因命兩人至京報公公見之悲不自勝旣刑部  
六年復歸省乃過蠡展墓歸復于考封公至是則故  
蠡墓歸與祖妣鄒淑人合塋于桐樹湖云僉事分巡  
湖北於辰州捕巨猾某靖有貪叅將胡瀚則以達兩  
院黜之滿三年改巡荆南監利大盜黎彥斌父子五  
人出沒蘆坡中衆至百餘公擒其四子彥斌遂自出



就獄 壽王之國保寧道由荆南宜都知縣王某歛  
千金餽 王公捕治知縣以金還民 王先驅有倚  
借以賄者亦法正之中官欲暫駐夷陵畏公卽急去  
丁父封公艱復補江西僉事分巡九江先是浮梁諸  
生六人赴省試宿于景德鎮被殺又淮藩奉祠某奏  
承奉舒芳門正胡王隱惡數事兩獄經數年不決景  
德在浮梁西界富實過於縣多豪民嘗請創爲縣治  
浮梁人不欲遂中止尋有六生被殺之事是時坐謀  
殺繫者十人公呼至案前一一口問之手記其辭  
卽仍令個之獄而陰令人之景德潛偵之見市中有  
談其事者故佯爲不知愕問故因至其所宿舍視其  
門戶墻壁詢盜所入已乃增捕十數人竄市談者其  
中作三次捕至屏人以向語質之皆謂先至者已吐  
實不能隱遂正獄豪民李光祿爲首從者數人皆鎮  
中惡少也淮兩豎有投鼠之忌不可窮詰然其人足  
以死乃當以可死罪而他涉及曖昧者悉不問直指  
據以聞俱報允丁母胡淑人艱正德初復除山西僉  
事遷右叅議已遷副使是時巨闞瑾竊政柄厚望諸  
司以貨公絕不與通而瑾故銜少傅謝公遷以公與  
同邑益瘦索欲中之卒無纖事可摘乃以稽遲簿書



罪罰米者三瑾有異父女弟談適布政孫逢吉生子  
聰任兵部司務狡獪多智瑾倚爲謀主凡僞作詔  
令多出其手自謂力能生死人氣張甚大臣莫不柔  
色下之四方餽遺珍物相望於道聰渾源州人公初  
補山西時以省帥故盛供具邀飲公託疾不赴履任  
後亦不以札謝聰大憾之捏爲蜚語聞瑾將中以竒  
禍會瑾敗得已聰亦坐誅 詔下山西籍其家公奉  
法以治弗株連州人感焉遷廣東按察使少傅梁公  
儲家在南海子次攄驕橫多勢取人業啜汁者復倍  
爲攘奪遂起爭至殺人兩京言官交章發其事并及

梁公或稍爲調護輒中白簡 詔遣給事中劉滉刑  
部郎中張文麟覈之皆顧望莫敢斷公檢故牘嘗當  
次攄謀殺人從者不行減行者一等杖徒又殺人時  
次攄已赴京里狀月日明白因嘆曰可避言而故重  
坐乎卽如前擬兩勘官默然服奏上得允聞者莫不  
心讚焉廣州有鴨埠稅供制府犒士雜用畜鴨者動  
以數萬計縱之蹂踐禾稿莫敢問問者輒被罪公革  
其稅并取鴨埠志焚之民賴以安上計京師遷河南  
右布政轉貴州左公爲人敦實勤內修居官以盡職  
爲務卽瑣細末節衆所不屑經心者皆必嚴必慎不



厭事然亦不喜事事至則殫力圖之既畢不以矜於人有問者謙弗自當也以是衆不忌然民庶則銜德懷惠結於心不能忘矣自貴州擢都察院右副都御史撫治鄖陽值歲饑爲請太和祠稅周給之漢中知府賈銓恃奧援肆爲貪虐陝西撫按劾之不能動公列其貪跡數十事上銓聞遂解印綬去衛卒爲暴於均州有司捕之聚衆逆拒公移文詰責卽共縛賊魁鄧璽等首服是冬乞休不允又二年 乾清坤寧官災 詔湖廣四川貴州三省採大木擢公工部右侍郎兼左僉都御史領其事復上疏乞休并陳採木利害大約謂木產於人跡所不至故能成其大土商採木皆積之谿谷間俟大水浮出然類皆中材其巨材以民無所用之亦未有採者恐非水力所能致故買木不費金致木費金不苦顧僦苦侵漁今願以兩法行之中材仍故事募商自致但微增其直巨材官爲採之以庸法徵金募願往者謹給直寧富役夫母飽宿猾 詔勉留公卽下工部博議皆如公策公徧歷三省鑿山通道沐霧露披薦莽至險仄處或舍車援藤葛行度高下遠近以程工力見役者必溫語慰勞之衆大悅咸勸於事三年木數萬至京師上嘉之賜



麒麟服初公議直稍寬衆謂額太踰慮或不給於費  
及竟役顧更餘數萬金 世宗卽位召公還部有司  
以餘金請公覈其數令各貯所在庫曰以待後役及  
釵功又縣推讓於前侍郎劉公丙因與劉公各蔭一  
子入太學公前三品績滿已蔭孫孟熙茲又蔭孫孟  
愷云又二年 兩宮成賜白金彩幣乞休不允出攝  
易州厰尋擢南工部尚書公攝厰時有所釐正不便  
者或騰謗言官不察輒以詆公 上潛邸故在楚習  
知公楚中治行不直言者然公前已屢乞休至是遂  
堅求去 上惜其去不許又固請乃許致仕令乘傳

歸仍命有司月給米二石歲輿夫二人後四年復

詔進一階公家自祖贈公父封公皆善爲詩公少習  
詩十歲卽能作絕句後居官凡遇事皆賦詩紀之歌  
行尤工巡湖北時作觀風行豪宅激烈有唐人遺調  
楚中傳之及茲歸惟日與故人賦詩爲樂好訓迪後  
進來見者輒勉以行義不獨學也遇仕人則談政事  
不置於四方事勤勤問聞有善政則喜八十餘精力  
不衰對客終日危坐無歌側客見公高年或謂退公  
曰吾未疲也長夏不晝寢晡後必觀書不則理一事  
至乙夜乃寢比及鷄鳴起矣嘉靖庚子年九十 詔



下存問直指王公紳將 命至宅見公儀度聞談論  
怡然心服年九十二壬寅冬十二月二日卒 詔與  
祭二壇遣工部主事謝體升治葬後十四年祀學宮  
國史有傳公生景泰辛未四月十五日配楊氏累  
封淑人某年月日合葬蓮花峰楊淑人生子二長文  
匡舉人贈光祿署丞次文斐贈南京詹事府主簿側  
室某氏生子二文忠文恩公孫高郵判孟莊號兩溪  
有女適我從兄贈檢討公嘗以公誌銘屬先文恪公  
未及具草茲公會孫蘇州同知三省復以命鑛鑛不  
文然不敢不卒先公之志兩溪公於諸孫爲長自高  
郵歸卽以祿餘爲公建祠於宅左子孫至今歲時祭  
不廢銘曰  
自三紀升作 四朝楨越六卿登閣九秩羸有百孫  
繩允五福并維一德貞于億世寧





南京都察院右都御史玉陽沈公墓誌銘

江南諸沈大都皆梁沈隱侯裔而歸安尤盛其最著者曰竹溪里南右都御史沈公歸安竹溪里人也諱子木字汝楠父諱應登選貢生歷官寧國青州鳳陽三府通判封工部主事郎中廣西按察副使贈通政使祖父諱鏊處士亦如封公贈曾祖父諱玘高祖父登仕郎諱輅其始祖諱子敬則初徙居竹溪里者也蓋在我 明洪武時下至登仕公數世矣而贈銀臺公敦質行爲鄉祭酒至別駕公益顯矻矻好脩居官有惠政生五男子公居長從同邑陳方伯應和受毛



詩嘉靖戊午舉于鄉有族子鷺而忍受別駕公恩輒報以橫逆侵及丘壠公以甫獲薦不宜訟卽訟不可自宗人始惟曲申論以理屈之明年成進士慨然歎曰嗟乎此吾涉世初也我先世脩儒業勤生歿以作家至家大人始通仕籍然居常不忘常布意常勗子木等去汰心毋效浮誇習子木日日心戒也且向者簫燈探徃籍未嘗不以古賢默相質茲幸藉累世德獲登第正宜思所以遵嚴訓酬徃志一失足則愈馳愈遠改步難矣乃先定志凡事俱從減損寓京師惟掩關讀書又兼讀律考過奏當研精法家言是歲選

當塗知縣當塗太平附郭邑直指駐節地也迎送甚勞又俗好訟多逋賦公夷然以閒裕理之吏民安焉會景王之國所需不貲從闕又橫索守張某有心疾將箕歛於間右以供公裂背爭之乃已公又謂長史某曰王而體天子意也者必軫恤吾民不使擾擾民非王意有私索者請奉三尺治之長史以啓王王曰此賢令也供張不乏久留此何爲即日命從官揚帆去至池州王懇索輦有司以江行無所事輦輦不具守惶懼不知所爲忽當塗以輦馳至乃王亦竟不用也守陳公應和故公業師公慮



其或有缺故預爲備焉辛酉歲大饑賑救有條民不知無年壬戌擢虞衡主事領盛甲廠廠有中貴主之物料半侵牟戎器具數而已公乃召工匠嚴諭之曰若曹不覩庚戌事耶虜酋入寇甲兵不繕王者皆獲罪若何玩愒乃親視器必期精好不中程者輒毀棄令重治之中貴鉗口莫敢出氣癸亥冬虜果猝至通州禁軍出禦敵戈矛弓矢之屬分給至十三萬有奇皆堅利堪用司空豐城雷公禮大嘉賞之曰此實心任事者也使人人皆如此何職不振舉丙寅遷都水負外郎是時上居西苑離宮別館營建甚多公亦

兼領公上方工作皆身拮据其間省水衡金錢萬計會河決徐沛司空朱公衡董其役隆慶丁卯擢公卽中領南河晝夜宿河上告成晉秩一級尋出爲建昌知府畧倣古循吏跡不尚威嚴郡有羅憲副汝芳講學著名時以郡守家居公數駐車與談理又進諸生課經術月旦其文藝自後登公車者多且居官多有名焉某邑有富民死無子爭爲後者訟連年不已公以天倫勸誨之遂交退讓卒歸之應嗣者鄉豪欲攘下戶業要人數爲關說竟執不與兵憲某簠簋不飾與公不相中乃反讒公公知之一日謁撫臺都憲語



次忽微詢曰監司若何公曰甚善曰不與府齟齬耶  
曰安敢廢公然則道路語籍籍何也曰府寔無聞都  
憲乃莞爾曰公誠長者前此江右有峒夷警郡募健  
兒爲備多江北人久之議撤奉令者失調護諸健兒  
呼噪不散公馳單車諭之曰汝誠不畏死耶勁兵在  
近壤撲滅汝如踏螻蟻耳汝作數百橫死鬼痛矣今  
爲汝請九十日糧供衣履之費以行脫介冑返故土  
不亦善乎皆感泣涕下沾膺曰公寔生我遂羅拜去  
庚午冬入覲明年正月擢廣西副使領右江兵備而  
歛殷公正茂舊爲江西按察使素器重公時以侍郎

總督兩廣聞公來甚喜每事咨焉殷公在嶺東西功  
最多靖洛容寧柳城田八塞里府江率用公策柳州  
有懷遠縣寄萬山中四面皆猺縣令寓郡城遙領之  
不入縣而令馬希武者慙喜事妄議城焉公曰此示  
之疑也猺將生心而按院李公良臣與馬有連主其  
議城未半諸猺已警警譁馬猶不省謾爲大言無何  
患作竟殺馬令 上震怒命急勦之而開府莆田郭  
公應聘重發兵檄府江還兵擊之故事土兵十月出  
師二月罷歸田作是歲爲萬曆癸酉檄至巳正月東  
裝待歸復驅之遠征巳懷怨會道中又大雪沒膝乃



粵中數十年未經者不勝苦遂鳥獸散賊知之將奮力犯我同事者與公俱駐融縣去賊止三十里議棄融還公曰此引寇自逼也吾一退諸屬邑如破竹矣密期總兵平蠻將軍李公錫督指揮黃鸞率浙兵三千直趨長安鎮扼其隘口賊讐怖不敢出乃徐調諸營兵六千人土兵三萬人分道進勦仍戒無妄殺遂連破七十餘砦斬首三千餘級獲故懷遠縣印戮其酋督府疏聞上嘉之賜白金文綺晉右叅政仍領右江未幾廣東征羅旁移公督戰窮其穴拓地千里丁丑擢按察使聞母陸淑人訃奔歸仍以羅旁功晉

右布政使庚辰爲忌者所中貶秩候調是年弟子來子倣焯俱登進士明年補湖廣右叅政督轉漕漕舟舊待兇漢口有風波之險公移置會城軍民便之甲申晉按察使會詔下籍江陵家一時承望者多旁吹求公獨持之曰賊貴得寔彼行事雖素多不善然安可懸坐諸公不悅又遼庶人罪廢乘此欲歸獄江陵興復國公奏記當路曰遼庶惡自宜滅國非故相以私憾傾之也故相破家不枉然不可執此伸遼謀遂寢識者壯之乙酉遷山西右布政使丙戌轉左晉中大饑公放鄭俠繪流民圖奏上得捐帑金十萬爲



賑因命吏治粥以飼餓人全活甚衆丁亥晉右副都御史撫山西督鴈門等關軍務會虜王死子當嗣封乃故桀鷙不俛首來時徘徊境上或擁鐵騎馳驟若要挾然衆皆疑虜盟將敗喜事者多謂宜遂絕之修戰守公曰是安可輕易古固云漢過不先彼佯吾亦佯重餌在此夫將焉往姑徐之當自就我銜轡耳已而果然晉宗室多不法陽曲有三四鷙霄者爲之魁略民間子女奪民財產不服者至用火炙蝎螫等毒刑劫之公請于天子置之法惡宗歛迹撫晉三年緩鞭朴戒浚削植羸困抑豪猾敦節儉下吏肅然其

飭邊備則修障殖穀明賞申約復屯政通鹽利清尺籍作士氣除戎噐事事覈寔制府上其功賜金綺者三人爲兵部右侍郎以父年及耄亟歸省甫三月封公病卒守制家居己丑子倣炘登進士辛卯閱視給事中有言調南京用遂晦跡丘壑者八年己亥起南太常卿閱掌故見懿文太子四時有祀痛建文君獨無祀乃草一疏曰皇上以孝治天下殆三十年欣承祖宗諸盛典無不釐舉獨建文祀久缺未有言臣竊謂建文君高皇帝孫懿文太子嫡長子五年御宇統順系明卽當成祖時且用



先臣王景之議以天子禮葬遣官致祭輟朝三日則未成祖之不欲廢其祀可知也相沿至今藐無成說生為金潢玉牒之主歿銜斷蓬飛草之怨若敖含餒伯有無依不亦悲乎皇上御極初年特念死節諸臣下褒祀之詔伏讀制詞有曰仰遵聖祖遺意褒表忠魂夫忠於建文者且祀矣乃建文獨不得祀耶弘治時禮部主事楊循吉曾以景皇帝為比議追謚夫謚且當議則祀尤宜急議今世所疑者不過謂倫次間稱號難定不知禮以情伸數緣時降第獲蟹蠻一俎猶愈於湮絕弗存者臣愚以為

留都誕育之區臨蒞之地生所憑依魂魄不遠宜即

其處或祔于高皇帝之側不則懿文太子側廟

祔弗淪儀典斯秩累朝未備之禮今日集其大成

列聖未慰之靈亦將懽忻交鬯于皇上之善繼

述矣疏具將上會青宮冊立少待辛丑轉通政使

至都即奏上之下禮部議如所擬覆上不報然時

論趨焉在納言七年勿避忌勿阿隨奸宄無所售計

封駁惟允時中官四出漁利而為爪牙者復多螻鷃

封事十九寢不下諸司日行疏亦半遲留不如期大

小負缺多懸不補河工告急水橫乏見金公從部院



後每遇災異皆上疏極諫俱不報乃引疾乞歸數十  
請未得允至戊申通前三品二十三年實在職十二  
年詔從吏部擬晉南右都御史公去志益堅遂移  
疾歸里日與親知置酒爲樂康強不衰已酉八月遭  
脾疾至十八日卒距生嘉靖戊子十月二十四日得  
年八十有二公貌魁梧昂然挺立爲人慷慨多大畧  
汪洋千頃莫可涯涘居官不上虛聲所經畫皆爲久  
遠利崇理學兼工文辭有著述數種藏于家事繼母  
孝謹弟子禾同母子來子采子杲異母皆怡怡和輯  
之最少者或退遜不敢均禮而公引與並席不以齒

驕之待諸妹有恩發居者分財濟焉旣貴敦舊交如  
平生嘗謂諸子曰石韋柳竇以簪紱世其家至今閭  
巷傳之乃功業不少概見然則不朽者徒青紫哉汝  
輩勉之無以科第自多以故諸嗣公皆孜孜勵行節  
有聞于時余太僕兄與公同鄉舉於公有世誼仰公  
偉槩深心服焉從諸孤命敬述其大都如此公娶嚴  
氏良牧公大章女累封淑人內德甚備詳馮公琦焦  
公竑誌表生四男一女長倣焯大名通判娶桐城簿  
陸公一元女次倣焯南虞衡郎中娶光祿監事陳公  
履賢女次倣焯福建右布政使娶山東叅政查公志



隆女次傲烜貢生娶國子生嚴公應桂女繼聘國子  
生金公志立女女適國子生凌公遂知子國子生後  
嘉孫男七女五傲炤生侍卿受公廕爲官生娶南平  
知縣陳公夢麟女畿卿未聘傲焯無子女適刑部郎  
中閔公世譽子國子生光德松江通判閔公世禎子  
國子生元衢庠生潘公允社子庠生嘉賓傲炆生莊  
卿國子生娶國子生嚴公廷佐女竣卿出後虞衡君  
聘湖廣司郎中閔公宗德女竣卿聘孝廉閔于經女  
女適南給事中董公道醇子國子生斯張字太僕卿  
錢公夢得子允康傲烜生折卿聘御史唐公世濟女

一未名曾孫男三女五侍卿生鍾北聘陝西叅政閔  
公洪學女莊卿生鍾元聘選貢生臧公昺如女鍾亮  
聘國子生朱公鼎徵女女俱侍卿出適國子生韓公  
敏求子庠生昌胤字南太僕少卿錢公士完子元慤  
孝廉孫公履恒子久亨二未字庚戌十二月初一日  
葬于下埭與嚴淑人合銘曰 執法大夫富有訐謨  
宣力社民所至拮据膚功在人弗厲其隅晚淹納言  
忠謹屢陳明統闡幽秩祀于湮比總留臺亦旣八旬  
抱德考終所積未伸恢恢遠猷歛于何所維子暨孫  
克紹其緒宏論在 朝待嗣起者



文林郎浙江道監察御史雷公國柱暨配兩韓  
孺人合公墓誌銘

當萬曆壬午歲天下籍甚稱雷御史也於時權相某者病憤憤矣其黨不自安共謀所以自固思代相者少宗伯某楚人也次可及其黨曰其乃以鼻食者何為有無又謀將以權相子一人繼之而兩子方為史官不得躡數等以進日夜相顧無策於是代為權相疏薦相六人公私參焉而某邑公者素和柔多可且近衰謝其黨以為易制因置諸首乘權相未絕時上之而內有闖尹為之主時見相二人蒲州吳縣比



命下則某邑公儼然居吳縣上矣滿朝詫愕其黨遺所知書曰某旦夕卽去某不足忌某邑公當國大師如存耳彼喋喋而咕咕如吾黨何某某謂二見相也自矜蒲如此是時吾國柱拜御史甫三日卽上封事極言某邑不堪相狀權相猶在牀闥尹持疏不下人久爲國柱危比權相計聞 旨乃下若曰某係故相某首薦御史何撫往事爲說不罷某亦不罪國柱若兩解和而天下已知 上意所向矣時有以書抵京者曰比見白麻無不駭耳洞心得柱後彈事 旨下無深語衆稍安耳其爲人倚重如此然彼黨爲謀日

益甚擬徧以私人布要地共執政柄若將盡天下之人才易置之所在四五爲儔屏人密語氣焰甚閃爍更熾於故相在日胥徒輿隸皆停筆佇足以待命賴天子明聖二三鉅公持之其謀不行尋敗白簡蜚起高墉隼紛紛落如風蕩葉某邑公亦罷有少宰某者彼黨魁卽造謀代故相疏者也以國柱有前疏甚忌之或傳將有疏刺焉惶懼使人吐款求免然國柱實無疏也或謂流言業如此疑終難釋不若卽遂之國柱曰不然我知彼奸不能先事舉因問乃發不直卽應之曰固無疏也某甚喜乃更申款曰得無蹂躪



幸甚然今衆口方煽願終無言沒齒不敢忘德國柱  
曰我言官也言由我不言由我適者本未有疏故不  
欺汝雖然可要劫乎欲言卽言是故在我或謂旣不  
擊何不婉言示德國柱不從然亦竟無言也是時彼  
勢已敗言之者皆有功不難於言而其卑辭來也他  
人答之不苦則其國柱直道而行不襲善不沽德出  
彼爲名高者數倍上矣受命巡漕巡漕者督諸運  
舟其過淮過洪皆有期往任此者率嚴督促或廣債  
伺甚或身微行以察之然猶後期國柱約法簡易人  
便之顧更先期大司徒亟稱之在丹徒中濕因病又

聞韓孺人計遂請告歸巡漕近設其經費金無幾又  
爲先事者預支什二三國柱儉於用比事竣猶餘半  
焉直指報命所薦吏率有謝金至武吏則以爲非士  
流人無從知卽畫金猶暮夜焉率納之國柱一切拒  
絕至有持金尾至家者竟不受也此卽致餽者告余  
者也國柱三十登進士初仕爲太常博士博士不治  
事職捧祝板詣上前其理劇者乃在典簿會典簿  
缺國柱署事會計精密寺猾袖手又大搜徃牒作太  
常考八卷凡禮樂儀數燦然備至今賴焉九陵祭  
器壞議修之國柱偕禮工兩主事徃中使欲因以爲



幸甚然今衆口方煽願終無言沒齒不敢忘德國柱  
曰我言官也言由我不言由我適者本未有疏故不  
欺汝雖然可要劫乎欲言即言是故在我或謂既不  
擊何不婉言示德國柱不從然亦竟無言也是時彼  
勢已敗言之者皆有功不難於言而其卑辭來也他  
人答之不苦則其國柱直道而行不襲善不沽德出  
彼為名高者數倍上矣受命巡漕巡漕者督諸運  
舟其過淮過洪皆有期往任此者率嚴督促或廣偵  
伺甚或身微行以察之然猶後期國柱約法簡易人  
便之顧更先期大司徒亟稱之在丹徒中濕因病又

聞韓孺人計遂請告歸巡漕近設其經費金無幾又  
為先事者預支什二三國柱儉於用比事竣猶餘半  
焉直指報命所薦吏率有謝金至武吏則以為非士  
流人無從知即畫金猶暮夜焉率納之國柱一切拒  
絕至有持金尾至家者竟不受也此即致餽者告余  
者也國柱三十登進士初仕為太常博士博士不治  
事職捧祝板詣上前其理劇者乃在典簿會典簿  
缺國柱署事會計精密寺猾袖手又大搜徃牒作太  
常考八卷凡禮樂儀數燦然備至今賴焉九陵祭  
器壞議修之國柱偕禮工兩主事徃中使欲因以為



奸利聚累年祭器如山積曰是俱當修二主事色難之則曰明年上謁陵問器所由敝卽以監修名對耳兩主事愕然國柱徐覩牲匣有九因折之曰太常供一物陵殿用一器此陵三少牢耳餘六安用之中使語塞姑請倍修國柱遂簿正祭器所省蓋不貲云其爲御史以博士選也比歸疾尋愈竟不復出惟以讀書爲業間授生徒或勸之仕不應戊子十月遭痰疾危而復蘇己丑十月六日痰復作竟卒距生嘉靖乙巳正月四日得年四十五耳傷哉國柱初諱士煌後改士禎朝邑人居新市鎮先世莫考高祖

遜生景瑞景瑞生寬寬生贈監察御史南河公世濟娶南大司馬韓恭簡公女生吾國柱恭簡公諱邦奇當代名臣也南河公布衣以高行重於鄉新市鎮有浮屠舍適暴吏張某者以戶部郎謫佐同州行縣至鎮欲假浮屠息僧局其戶及持之急則詭曰是韓尚書婿司其鑰某大怒不詳察卽命隸卒擁南河公來椎案大叫櫟交下如雨時國柱及兄士輝俱爲諸生往哀訴不聽旣乃競以身覆父背上願代受櫟亦不聽愈怒南河公竟卒已詢知國柱明經有名也復造別辭媒孽之督學與某爲同年友將聽之郡邑人士



大不平有仗義者直剖其所以然督學聞之乃已國柱鬱鬱痛恨每念及輒哭泣數數哭泣至嘔血數升誓雪寃因號雪菴後暴吏某疽發背死乃更號慕菴某膠州人國柱卒後二年某之子舉人某家居有友邊生過握槊歸而暴卒邊氏與張氏素有郤因以鴆死訟之萊州推官李某治其獄榜笞舉人百餘加桡楊焉猶用大挺數十不已竟誣服後鄰郡推官覆案出之余時撫山東閱其獄邊生老故有宿恙實非鴆也某雖脫死然其受榜笞則已過於南河公其無妄亦似之李推官關中人人或謂故爲國柱復讐者綜

其實不然然亦足以雪南河公於地下矣國柱早慧五歲通算法六歲就塾師學卽知所授書大義爲同學兒誦之外王父恭簡公甚愛之常置左右楊忠愍公繼盛恭簡公門下士也言事謫狄道尉入關謁恭簡公國柱甫八歲從旁竊視意恣恣歆慕比去謁恭簡公曰客凜凜異人哉爲士者不當爾耶恭簡公益竒之語門人張明傳曰此兒必以諫顯第恐傷於激無益吾老不及見之子異目盍以吾意語之後國柱自廵漕還北也至通州又欲有所彈射友人以義諭之遂止是時國是初更好事者爭求多焉會蒲州遭



難去一二慮及者倡說不根人心搖動然豺虎已余  
么麼數輩狐潛兎匿不久自散去急之則異說蠡出  
且持正論者或未必正言愈多是非益淆不如靜也  
人皆以言重國柱余獨以不言重國柱以其能不言  
知鄉者之言非動於名也恭簡公可無恨矣國柱兄  
第三人伯兄士燿早卒仲兄卽士輝事之甚恭猶子  
五人皆爲延師訓之國柱持身廉又好施常以歲歉  
貸麥於富室比至門則持橐而告急者十數國柱笑  
曰我微生哉卒欣然與之用是益貧比卒猶負債數  
百病亟謂仲兄曰某某素知弟者必不索償可姑緩

某某宜速償意切切不忘砥礪也所著詩文若干卷  
未梓行韓孺人庠生仲咨女太孺人從女也沉靜善  
治家生嘉靖壬寅八月七日卒萬曆癸未五月十七  
日得年四十二同南河公太孺人先後受封生四女  
庠生劉捷長婿也次適孫應第天次字范鋹參政某  
孫郭宗昌布政性之子繼配處士韓仲訢女於孺人  
爲族妹柔惠善撫孺人諸女生隆慶庚午七月九日  
卒丁亥八月十九日得年十八側室三人韓氏王氏  
陳氏韓先卒王生子壯二女長字馬戴余雅知國柱  
乃士輝二子奮與楊者以馬符卿顧甫所爲狀屬余



居業考編 卷之五  
銘國柱善行甚多詳狀中余撮其大者勒之石銘曰  
西睡倚關碩賢維韓司馬之子外孫復始云以諫著  
果符厥譽挺挺孤立不惑不懼簡易近下漕績乃叙  
疾而里居枕籍以書所噉匪名負則有餘歿後雪讐  
左契不渝遠猷未施有行作模石其徵諸

通議大夫廣西等處提刑按察司按察使楊公  
墓誌銘

按察使楊公者諱世華字懋成別號完愚我大母忠  
烈夫人從孫也楊在姚中爲顯姓登仕籍者甚衆迺  
我外曾王父拙菴公獨隱居不仕然好書有遠識宗  
人重焉晚乃以貲爲郎我大父忠烈公婿楊氏寔拙  
菴公才選者也孫氏自忠烈公始顯而大母夫人治  
家有法不異孟氏母子孫惟所自咸重外家以故孫  
氏楊氏視他外家兄弟誼尤篤如同姓云拙菴公諱  
苓生雲坡公諱節工楷書嘗以鴻臚郎直兩制忤闈



劉瑾謫袁州幕鬱鬱不得志遷倅高郵歸晚年畫尤  
精人得其手跡者咸寶之生古愚公諱大綱不仕以  
孝友名有五丈夫子長世芳嘉靖丁未進士汀州知  
府次世英庠生次卽按察公次世美世蕃皆庠生余  
四歲時在京都識兄汀州公卽如從兄不異十三歲  
寓郡城始識我完愚兄是歲嘉靖乙卯兄始登鄉舉  
也明年上春官不第時汀州公在刑部因留京師益  
篤志本業武進吳太史可行慕之延以訓其弟中行  
壬戌兄登進士時余在家仲兄宗伯公謂余曰十四  
兄固宜中前已未時在傢同見其落卷寔佳兄蓋行

十四也是歲除南刑部主事治獄持平例未嘗傳致  
人罪隸比者皆不怨晉員外郎郎中隆慶改元實授  
先是我伯父以汀州公在刑部贈主事至是乃贈奉  
政大夫南京刑部陝西司郎中云明年兄擢撫州知  
府以仁恕爲政不苛擾窮谷頌德庚午冬上計京師  
余燕飲間問兄曰聞茲郡巨室多當不無掣肘將奈  
何兄曰彼地尚禮吾敬之如禮惜禮者多自愛設有  
請惟據法上下吾敬禮終不失彼雖意不滿然禮在  
也寧重銜我在坐或曰江右訟師善爲幻有訟者卽  
以其黨僞爲見訟者惶恐伏罪比爰書定寃者尚不



知兄不答言者去兄乃告余曰此所謂紙棺材者此必關財產事今訟勝則且匿其案俟十餘年後斷茲獄者皆去乃往攘其業度彼亦必訟然舊案在欲覆密詢之間井久之真情自出度無偽獄案乃定若夫爭鬪須見決者此自難以偽何慮此二者足知撫州政矣後二年遷廣東副使兩臺留之仍徙江西治如故弘大體不汲汲爭名然自檢則甚密法有不可卽直指前必力爭之萬曆乙亥轉山東叅政督吳中稅推誠與人不甚見短長賢者悅服不肖者亦茫然莫知所窺以故彼地人情雖不齊然見兄則心醉人人皆謂叅知公親已其行政不廢催科第不以嚴刑促之貧乏者或暫與假貸時時見爲不得已民亦知兄向濡之相勉完賦每歲竟課賦額有倪左史之最焉踰二年擢廣西按察使兄敷歷久益精政術事皆迎刃解粵西又少事案牘甚清又兼有禦寇功錚錚向開府列卿矣會時政方尚苛察兄矯以惇大見謂不綜核有同年友在要路急欲相引兄于于應之要人不悅忽有詔覈臺省長吏凡長厚者多罷兄亦在罷中以致仕歸兄生平鮮喜怒或有所忤不見於色待



其人如故久之若忘性緩顧每以緩集事在南曹有公不平同官一人攘臂欲往爭之兄弟遙呼曰來其人返問故兄曰姑坐因纏絲作不了語相遷延莫決遂不果往既而事竟白又有大獄或先爲飛語云將投重賄又云以要人某書來衆曰事以灼灼宜急且獄無使隙生兄故徐之衆屢促兄曰某事未的已又曰待某証至既而情得與初所鞫殊賄囑亦竟不來前云云者乃敵家懼獄負用反詞相激也衆乃皆服居鄉亦大畧然陳恭介公嘗曰人人完愚悶悶然其於世情極透發必中的又常蚤覺有人所難者彼固易之勝彼察察矣宦無贏資僅僦舍以居田不多恒躬課耕耨盛暑僕僕田間既而食積漸繁養殍幾不繼處之自若時與閭里相過從道宿昔爲樂不立畦徑間訂約爲會奕棋飲酒兄不善酒然喜治具不厭曩受業生吳君中行後爲翰林編修以直諫杖闕下既復起宮諭名震四海人視其言爲輕重甚推轂兄會渠與時忤言不入故兄竟不起吳君嘗告余曰人謂我師才短然我知之其實有餘世自重彼僂例者耳余自童時兄視之如翁時時提耳訓誨有疑事質於兄兄必詳論始末直示所以調劑者余敬聽之



迄無悞余甲申丁母太夫人憂歸與兄相從七年近  
丁酉解組歸又七年非兄它出無半月不面間追隨  
棋酒間真不異手足而今已矣有過孰我箴余蓋痛  
之甚焉兄敦於天倫長兄宦達無論矣仲兄蚤世買  
山塋之壬戌兄試禮闈甫畢役榜尚未出夢仲兄哀  
語相勞若云汝今已登甲第獨我長湮耳即率之日  
也非天性篤至安能冥感如此兩弟在青衿尤屢顧  
恤少弟卒亦為理塋事仍鞠育其女為之擇配族戚  
貧者時周之不責報焉兄生嘉靖乙酉四月二十日  
卒萬曆癸卯九月八日享年七十有九配邵宜人太

學生邵公良臣女五男一女孫男十二女四曾孫男  
五女三長男秉璋庠生娶庠生徐公華女繼禮部儒  
士諸公應璘女次秉瑞庠生娶蘇郡丞陳公三省女  
次秉珪娶審理謝公用樞女次秉珣武舉娶余少宗  
伯兄女繼杭州百戶應襲孫公先篋女秉瓚娶真陽  
尉葉公懲女繼胡公同招女女適東鹿令鄒公珩子  
蒲壯把總懷忠四男并女俱邵宜人出瓚側室馮氏  
出璋生應軾庠生娶衛鎮撫龔公道行女應轍庠生  
娶始興簿嚴公尚義女瑞生應選庠生娶徐公士克  
女應述娶吳公一鵬女應運聘施公女珪生應宏庠



生娶庠生鄒公一存女應宸娶謝公復淳女應賓娶  
張公國華女珢生應賢娶徐公應鯉女應贊應資未  
聘瓚生應鰲聘胡公宗華女璋女適庠生周忠弼瑞  
女適庠生孫業鉞胡維諤珢女未字軾生國光庠生  
聘葉公遂女選生國器國肇宸生國佐俱未聘遂生  
國宏宸速各生一女俱幼秉瑞應軾先兄卒楊氏系  
出關西宋末元兵入臨安駙馬都尉楊鎮等奉二幼  
帝匿婺州山中潛走温州有正一侍郎者提舉餘杭  
洞霄宮奔赴行在不及遂止婺州後子孫復從外家  
錢氏徙餘姚 明興族廼大成化後甲科接踵或

時者數人未嘗中絕獨今中絕矣嗚呼傷哉然諸生  
中嶽嶽馳名者數輩卽我兄諸孫亦皆瑚璉器也行  
有繼起者矣嫂郡宜人先已葬邑西上虞竹橋之塔  
園山萬曆 年 月 日秉璋等將以兄柩合窆焉  
銘曰  
外家危奉君姚系衍之觀察屬屬樹百年以木艱于  
時屯厥施吁後人不愆儀肆其績之



廣東按察司副使嵩巖張公墓誌銘

余初仕爲職方主事與嵩巖公同官知張公最深云  
公諱堯年字長卿父曰啓元邑庠生封兵部主事祖  
父曰遷處士曾祖父曰璿正德辛未進士歷官刑部  
員外郎其先湯陰人宋南渡徙杭已又徙餘姚 國  
初時給事中惟一以直諫謫戍雲南洱海衛第三孫  
皞留姚越二世至比部公始顯而比部次子達正德  
辛巳進士任給事中亦以諫謫戍後贈光祿少卿處  
士長子元嘉靖乙未進士仕至衡州府同知至公蓋  
四世進士矣公隆慶戊辰登第學政吏部進士不與



部中事自公堂一揖外惟以次詣闕下領所請章疏公日必早起迄兩月未嘗一乞洗沐冢宰蒲陽公甚重之因授以真定推官真定畿輔大郡近京爲理者多擢臺諫蓋所謂上缺者也公不厲聲色而訶察最密先太僕兄時令長垣諸邑多同年友相聚皆曰里中有絲毫事張年兄必知之彼以何術得耶學院陳公省開恒山館訓諸生命公董其事所成就名士甚多若趙考功南星曹總河時聘王奉常三餘喬開府壁星皆其最著者趙君尤德公嘗告余曰每暫歸次早未起嵩巖師使者在戶矣辛未選臺諫時楊太

宰已引去新鄭高文襄以閣學掌鈐事或中公以口語不得與擢刑部主事無何高公去楊公復爲太宰迺調公車駕明年爲萬曆癸酉轉職方員外郎甲戌余備員職方職方員多公署狹余所憇舍卽在公堂側而職方郎主邊務日不暇給諸雜事皆兩副郎專行之半月互更焉公每出視事余在舍諦聽公言簡而盡造庭者皆警服無敢盡辭者有戍卒奉牘來公曰汝冒名者也笞之其人不悟疾呼曰我非某也我非某也余聞之笑然不知公何由辨之都憲陶公大順時爲正郎嘗戲公曰公慎決事有竊聽者在傍蓋



指余也而公又時時教余爲官謂宜勤宜隨事研究  
司空有役借卒職方卒不給以直償之工曹移文屬  
余受事公曰輸其直不領其役繕作非吾職此由前  
任者誤峻拒無害余敬諾焉未幾公轉協司郎中明  
年改武選郎中是歲冬考選軍政公履任卽留心密  
訪行伍間錙銖皆得其實黜陟咸當余嘗入朝見  
中貴人偶語曰凡武弁月且無他求但問張武選卽  
得巷語亦然名譽更大起余嘗從同邑諸公謁少司  
寇翁見海公翁公謂公曰頃面冢宰及大司馬皆亟  
稱君行將有重託似無須守府矣京都目職方爲大

郎番涎者衆有宵人忌公構別語於當路適又舊僚  
候補者數人來欲得缺遂擢公河南參議果亦不守  
府然非昔指矣叅藩駐大梁主國課歲一至小灘  
督運時有竒羨或遂私用之公不然悉以歸藩帑充  
經費年饑藩宗祿不給公叅伍乘除之皆心悅以此  
中州遠近翕然稱張少叅三載陟廣東按察副使領  
惠潮武備龍川有劇寇鮑時秀去邑城二十餘里與  
礦徒相倚角出沒不常時有剽奪公徵三大校由東  
水藍田龍川分道勦之賊愕出不意皆鼠伏斬勁酋  
杜九思餘悉就擒於時士不滿三千役不再旬而數



十年摠集之寇蕩然督府上其功 賜白金辛巳京  
察從郎中秩貶等調外猶尚以前語也抵家一年代  
事者欲有所上下其手取公前征龍川軍費摘其出  
入數臆定之以白於直指莫沒其餘直指不察以公  
在謫籍知其無內援也遂加重劾余時在考功同官  
黃君克念中州人習公行事曰嵩巖公豈有此余爲  
力爭於太宰謂宜覆覈太宰然之而執政銜公深不  
可破竟從罷例余甚愧焉然公不以咎余見余畧不  
言及飄然若脫屣也公明達練於庶務善綜核好譚  
吏事余間有所叩必悉究首尾酌古今之宜舉其要

領所指一一破的余每心醉余嘗歎息謂公才最宜  
爲官其居官皆有勞勩無瑕垢而鸞翮中鍛勲績不  
見於世今人談世務動稱乏才夫有才厄之使困又  
何喋喋公解綬時年甫四十六壯心未灰抱干將無  
所試則日走四方嘗入燕者再後乃更至塞上若吳  
楚近區則時時命舟攬山水採風俗至老不倦問之  
其荅如響居常亦勤治生所就產業皆非宦中物性  
不喜飲里中宴會多不與惟奉考封公或間聚兄弟  
爲家人樂善脩容每旦早起衣冠必整潔生嘉靖丁  
酉八月二十五日巳酉四月九日遘疾卒享年七十



三娶太學生魯公三女封安人公無妾媵二男二女皆安人出長男汝芳潯州府通判娶全椒知縣史公銓女繼鄞庠生袁公森女次男汝舟邑庠生早卒娶精膳主事呂公兗女余甥也長女適中府都事翁公時旦子日教次女適湖廣副使陳公鏞子溥皆太學生日教早卒汝芳三男一女之翰聘太學生蔣公銳女之鼎聘太學生鄒公士光女之屏未聘女許字舉人史記緒子可志汝舟亦三男一女廷臣娶庠生邵公欽隣女廷賓邑庠生聘衛經歷許公衛女廷案未聘女未字膳部父爲太傅文安公都事父爲司

馬見海公憲副父爲宗伯文僖公蔣太學父爲少叅雲龍公鄒太學父爲方伯龍望公史孝廉父爲太史鶴亭公餘皆名家云庚戌十二月十三日葬豐山銘曰磊磊張公恢乎多奇雖登藩臬未竟厥施足儲平寇皆善者幾其韞在中淵然難窺後葉熾昌德慶斯貽



湖廣布政使司右叅議雲龍蔣公墓誌銘  
餘姚蔣氏自諱彥祥者始相傳云故江右南昌入元  
至正中判餘姚州事因家焉其在宋則知樞密院之  
奇最著蓋去州倅公者九世矣按宋史知院宜興人  
以伯父禮部侍郎堂廕擢進士第侍郎工文辭尤有  
時名而知院曾孫芾左僕射同平章事其徙江右又  
不知自何時也入我朝至嘉靖戊戌澄江公始登  
進士上去州倅公七世澄江公諱坎歷官臨江知府  
有子六人其第二是爲雲龍公公諱勸能字汝才年  
少善文壬子補邑弟子員尋以貲入太學丁巳余從



居業考 卷之五  
先文恪公之南都遇公於臨清始識公辛酉公中順  
天鄉試乙丑登進士授行人公冲雅有儀見人色温  
温然又工於專對嘗使秦藩唐藩所在人敬慕  
之咸謂必入臺省會當路有忌姚人者止擢祠祭主  
事是歲隆慶戊辰也庚午晉主客員外郎遭澄江公  
艱歸癸酉起補精膳萬曆甲戌余從公後備員主客  
是時署中多知名士方共訂讀書約欲兼通今古先  
讀經濟錄吾學編次乃讀左氏傳班范諸史經濟錄  
者新安人所輯明興以來諸名公書疏也而吾學  
編者鄭端簡公所集我朝史也今書日一卷古書

半之各以意加評點十日爲期公退時集署中名携  
所讀帙來直會者一人朗誦遇有疑則共相辯論余  
因得聞公餘教公沉細不爲枝蔓談衆紛爭時公默  
然聽之間出一語折衷輒中的余深心服焉乙亥擢  
精膳郎中丙子出爲湖廣右叅議分轄衡永寔駐節  
未州未與廣西界峒徭爲患時道州甫被掠公詢鄉  
民知有徭老者爲之謀主乃集兵爲勦聲而陰用恩  
惠撫之於是徭老懼諭其衆歸所掠公因召來與語  
爲除其罪曉以禮義又立社學簡其子弟教誨之徭  
人悅服而廣徭攝公威德終公在楚皆歛跡莫敢擾



永以徭警嚴夜禁犯者輒斬首奸民或乃賄邏卒報其私伺夜出掩殺之公曰是且甚於徭矣下令必生獲敢擅殺者死閭里以安公內明而外寬其政以慈惠爲本不屑屑求名然仁澤及民者寔多未屬邑零陵易治以附郭稱繁官全設而祁陽在郡東北民狡悍多盜官乃不備公請損零陵簿以益祁陽兩邑至今便之零陵有要人氣焰甚張宦楚者多屈意奉之屢以事託公公不爲意因構公已卯公丁母太恭人艱歸遂中白簡時直大計余在驗封而考功郎者公之同年友也爲緩頰解於相君相君內已有主乃佯

曰此人無大過第才不任劇耳遂從鐫一級例辛巳直指復加重劾時公離任已二年又計榜旣揭何深求如此莫測其故直指臨江人澄江公舊守彼郡疑或有宿怨未知然否然公自此不仕矣未州龍興寺有息壤椰子厚嘗記之謂隆然負磚甃而起者步四步高尺五寸始爲堂也夷之而又高凡持插者盡死由是人莫敢夷子厚曰南方多疫勞者先死彼時捕者其死於勞且疫耳土烏能神余亦以爲然公在未州時彼要人冀攘此寺爲宅郡邑皆唯唯獨公持之不與公歸後數年地竟歸彼土功與執役者八人一



日盡死未幾彼要人亦卒宦未者貽公書曰使公早  
與之則向時彼已死無能害公矣余與公相共驚異  
按古籍息壤有二一甘茂盟處一卽此所云鮫竊以  
堙洪水者未知孰是觸者死前後皆符然則理誠不  
可窮柳公以勞瘁當之者亦臆說也初余同公在禮  
部時寮友皆相契者情好甚洽余初入仕不悉世故  
妄謂仕途多賢可時時得師友及後徙他署則不能  
然卽禮部至今亦皆謂不能如他日之盛然則昔所  
值誠爲希遺是時余邑三人尚有鄒方伯國材冷諸  
公皆躋顯位不亦享榮名獨公抱憤懣以沒可爲太

息公每與余道舊故未嘗不歎戲感念也公家居惟  
好讀書所著姚邑賦爲人所稱有詩文集若干卷公  
生嘉靖甲午十二月九日卒萬曆辛丑九月十八日  
得年六十有八娶宋氏山西按察使宋公岳女在官  
兩遇覃恩行人時馳封澄江公中憲大夫禮部時母  
黃進太恭人配宋封安人公無媵妾四男二女皆安  
人出一龍一豹一鰲俱庠生銳太學生龍娶河南都  
司斷事馬公萬女豹娶余兄禮部侍郎正峰公女鰲  
娶廣東叅議胡公時化女銳娶江西叅政何公繼高  
女龍豹皆早卒長女適平陽同知史公自上子元杰



次女適刑部侍郎邵公陞子太學生欽順孫男六龍  
無出豹生茂浙茂瀘皆庠生瀘爲龍後鰲生茂洙茂  
泗銳生茂瀚茂潢浙娶望江知縣韓公臯孫女父高  
安主簿裕瑞繼聘亦瑞女瀘娶貴州副使徐公應箕  
孫女父場大使繼仁洙娶靈寶知縣周公大宇孫女  
父庠生恭慶泗聘庠生施君應龍女瀚潢未聘孫女  
三俱銳出長字鶴慶知府黃公兆隆孫端亮父太學  
生光祐次字廣東副使張公堯年孫之磐父太學生  
汝芳次未字曾孫男一洙生士漠女二瀘出俱幼癸  
卯二月十五日塋於邑南之聚粒山公猶子一驄登

進士今爲崇安知縣寔狀公銘曰

忻忻蔣氏有公父子德是似皆縮金紫陸沉膳部  
與陳編伍惠甫洽於楚遠鍛其羽世澤長存施于子  
孫鳳舉鴻軒後葉以蕃

王德始從餘姚居江之... 曰史家步後四世而過



父庠生恭慶泗聘庠生九君應龍女瀚漢未聘孫女  
綏鳳舉貳博翁葉以蕃黃公光陸孫端亮父太學  
與刺繡五惠甫合外焚燹避其隱世鬻琴亦於干午  
補內縣尹亦公父干午一縣具以替縣金紫劉氏鄧氏  
娶士今爲崇安映綵宴米公繪曰山公猶子一聽登

中憲大夫河南彰德府知府史公墓誌銘

史公諱記勳字稽叔周史佚後也漢史崇封漂陽侯  
不知居何地隋亂子孫來浙諺曰江南無野史蓋皆  
同所出云宋南渡右丞相直翁浩其弟洵數傳至處  
士德始徙餘姚居江之南曰史家步後四世孟通  
明初舉耆儒授乾州同知又二世梅隱公盛徙邑城  
龍山址生贈大名通判誠軒公簡則公高祖考也曾  
祖考兩泉公鵠廣信同知祖考舜涇公桂國子生贈  
翰林編修考垣樞公銓全椒知縣以公績最先封南  
刑部主事後贈彰德知府妣錢封安人太恭人云大



恭人刑部員外郎緒山先生女以嘉靖壬子五月三十日生公公早慧卽佔畢常先其群輩丙寅補邑庠生從季父編修公修業雲間業頓進萬曆己卯中浙省鄉試庚辰避季父同考不試癸未登進士授南刑部陝西司主事丁亥遷貴州司郎中南曹獄簡然都城人易生口語事未決謗議已沸獨公所斷無異說暇則從諸名士談理學討文藝己丑遷湖廣德安知府時鄰郡旱爲災流民轉徙德安亦騷動公以寬政恤之民安業 景藩在故承天有采地數萬頃德安居半 景藩絕悉歸州邑及是潞藩請得之而 潞

王 今上母弟也中貴挾長信之勢將踰額攘焉且重索歷年官已征租土民惶懼荆西道奉檄下公覆之公按籍履畝寸度而鱗次銖粒無益藩使或誅以危言不爲動益駁議者再三卒如初籍仍止與見租事遂定郡有守禦所其千戶將席條鞭法漁于士伍公曰此蠹軍興者也因版正其數請之憲司斥千戶賦法如故直指薦爲三楚治平第一庚寅蒞垣樞公艱歸癸巳服闋補四川重慶僻在西南隅去都城可萬里土饒而禁網濶前守或姑擁腫執掌之文書積滯民怙俗而玩令貨取弗詫而詫行法公一以明作



施之宿奸歛跡未兩月完積案八十餘事有疑獄匿其姓名久弗決面鞠立白巨室子或不得於繼母出居外舍貧窘無訴比父卒竟不得歸執喪涕泣門側其父亦進士公將往弔乃陽言曰若某不爲喪主者太守不往其家不得已聽令入比公歸遂逐之出一錢不分公乃召其諸弟至庭中諭以禮法仍捕豪奴罪之以戚黨尊行平其產母子迄和勸經術時集郡諸生程其藝能自是皆彬彬有文登省榜者視昔爲多是時播州宣慰楊應龍方與黔中七姓夷爲讐凡夷性讐則相殺其俗固然而應龍強七姓弱每恣睢殘虐之兩省聞見殊在貴州恒右七姓在四川恒右應龍以是互爭不決而應龍閩庭內頗有不法其所統五司亦每苦應龍侵漁然亦止魚肉其黨而已寔非有背叛 朝廷意若初時塞其涓涓一獄吏事耳第此酋富藏益能以賄中人在事者或沒於賄又不能爲地則輾轉爲詭辭以應而我材官及隸卒輩受命往諭告或偵事輒索貨不已彼益厭又諸土酋率愚贛不識文字每倚中土工筆札者爲之謀主此諸猾利其構怨則故造不根說鼓動之冀執其命每不欲寧謐又直指奉三尺行部見七命五司所訴應龍



罪惡狼籍則憤怒必欲齊以內地法貴州尤甚而中丞習知夷情謂此彼自相讐殺但恩威陰陽之卽得何爲以隨珠彈雀以此兩執法持論又每相失久之瑕釁益開則直指說勝公至重慶時中丞某公已力主勦柰慮不深以冒進敗而應龍猶詭謂不知謾爲好辭謝罪某公旋被言去執樞者懲於寧夏朝鮮之役厭兵聞敗益疑懼欲仍以勘鞫畢役卽中朝諸公亦多謂然顧此酋見獄辭屢移易無究竟時恒慮有他又念唐末來八百餘年中原幾易姓而彼據穴自如要無終絕理且巖峒深鳥道危縣度我兵必不能入而其兵爲川中寇每征勦必首徵發數十年來軍功皆仗爲鋒益驕曰是無柰我何漸懷不軌公揣其情得之堅執勦爲是力自有任當事者慮爲梗陽推公治行謂不宜在退方甲午遂調河南彰德而應龍止罰四萬金褫職用其子朝棟嗣事卽號爲正法論功叙錄矣公治彰德如前兩郡寬猛互用郡中清理趙藩宗支盛祿不繼或逋至歲餘其來已久至及時又不能無先後貧宗日譁於庭公定以期歲四給給必人人足額尤加意孤嫠者藩宗悅服歲歉請蠲賦萬金易折漕粟數萬石發贖銀糴粟食餓者境內



饑而不害丁酉邁太恭人艱歸公以塋兩尊人卜吉  
因習堪輿家言已又習陰陽家言皆識其槩卽專家  
莫能難居惟讀書課子無世俗侈奢之好意斤斤常  
若有獨是不與俗同閭里中往來亦簡間有吟咏然  
不甚苦致力戊戌中口語貶秩一級播酋雖浮伏罪  
竟不出罰金已亥遂大決裂中外咸主勦追論前事  
兩省中丞皆削籍藩臬以下或謫或斥直指乃白公  
前被調非是云以主勦故因徵四方兵搗其穴熾之  
應龍自殺妻孥俘入都人乃皆服公之卓識公體素  
弱庚子春忽患膈悶減食飲乃習靜錢塘西湖上數

月竟不愈及秋歸九月九日卒得年四十九公敦內  
行篤於天倫在南都聞大母管太孺人棄世寓書垣  
樞公曰曩祖考發喪皆季父主之記勲今已服官祖  
妣喪願爲大人主辦垣樞唾之曰汝囊幾何而爲此  
大言耶識者善焉後垣樞公捐館太恭人哭之慟勸  
不止公曰大人得無念亡弟諸孤乎父遺業請悉與  
之蓋垣樞公止二子公爲長次公早卒有三遺孤皆  
幼太恭人聞公言雖不輟哀然意則稍慰戚里咸頌  
德焉公號忠嶼配鄭氏累封恭人御史鄭公寅仲子  
禮部儒士資元女生男五長可傳邑庠生娶國子生



韓裕吉女次可久邑庠生娶山東布政司使鄒公學  
柱女次可迷娶靖州知州邵公欽諭女迷與婦皆早  
喪次可鑑邑庠生娶國子生周昌祚女次可贊邑庠  
生娶國子生余甥呂胤晟女女二長適余甥河南呂  
參議胤昌子邑庠生天成次適福建僉事邵公夢弼  
子邑庠生爲棟側室周氏生女一適銅仁知府趙公  
淳卿子國子生應李孫男四尚實可久出娶邑庠生  
葉繩祖女尚古聘國子生顧一清女尚論聘邑庠生  
張夢龍女俱可鑑出尚欽可贊出孫女二長可傳出  
適國子生盧述思子邑庠生承欽次可久出適國子  
生翁時宣子日敷庚子十二月二日塋慈谿車廐驛  
之錢家嶼與垣樞公墓相望可六里許兩墓地皆公  
所自定也銘曰  
經術治禮比部筮仕陳力斯始不寃是似作大郡表  
歷楚蜀趙雖中幡幡不損矯矯藩地無軼藩祿有則  
智讐逆首弗終遠猷四十有九夫豈云壽含德幽宮  
宜昌厥後



宜昌天象

皆警世首典絲絳燭四十有八夫豈云壽合斷幽宮  
聖焚置鐵鞵中斷斷不許齋齋此無痺齋新育限  
對淋台豐出陪送出刺代淇故不窺長以於大猗素  
祖自安也終日

之疑家輿與匪匪公墓麻望河六里皆兩墓此皆公  
生餘報宜千日燦夷千十二  
日墓慈嶽車頭

石阡知府岱陽呂公暨配謝恭人合葬墓誌銘

岱陽呂公者太傅文安公第三子也先世自新昌徙  
餘姚六傳至文安公始大顯文安公元配夏夫人後  
為檢討復納傳恭人岱陽公傳恭人子也嘉靖戊戌  
文安公遷南司業八月十五日生公于濟寧因名曰  
克生而白皙髮黑漆貌類文安公性凝重不好嬉戲  
年十六娶謝恭人恭人父行太僕丞諱一鵬太傅文  
正公從子嘗與文安公同受業於文正公仲子少宰  
公之門因締姻焉甲寅公補羈庠生文安公相肅皇  
帝丁巳歷一品三年滿廕公入太學庚申授後軍都



督府都事已遷經歷隆慶初改宗人府優游閒曹者八年夷曠自適不碌碌逐時好有簡貴聲然官譽不墜文安公去相位久無人念者戊辰擢貴州石阡知府嶄巖西南陬夷獠雜居無屬邑不爲善地其俗刻木爲記儉而尚鬼公襲舊爲政手摩而心煦主在不擾俗咸便之夷種皆懷德焉一日出勸農群雅噪而前導因隨之往見死人臥榛莽間乃府所論發徒也捕治果送徒者道殺之辭服論死則遠近驚異以爲神辛未上計至京師人謂宰相子甫壯而縮郡符今三年矣譬之草木秋告成則收其實奚問工拙遂罷

公歸公不怨飄瓦留連與故人懽飲所在爲游觀遲遲乃歸公性好飲而不耐束於苛律居常徐徐于于不浮慕以廣交惟合已者善待之然坐無賓輒不樂也謝恭人善會計常衡出入以制用客至不問所從來咄嗟卽辦然無溢費以此公益得肆情於歡伯萬曆癸未七月二十三日恭人暴卒公悒悒不快已而愈散金爲懽視昔更侈顧持籌者無人囊橐日澁雖然公懽不減也買鄰人餘地構一軒於宅左庭中藝嘉木名花四牕琳瓏於燈火筵尤宜常以奉文安公懽比文安公捐館舍則以召客余嘗一至焉蓋奧而



敞木石皆雕鏤長廊密室相聯屬足徜徉矣而公又  
不安於此猶時爲四方之遊日費數金不惜不足則  
典酒槍以資用大詘若固然耳公旣治三尊人葬事  
畢則自營兆域於豐山之陰因葬謝恭人丁酉公六  
十矣行樂如昔及秋忽病瘧已而愈第嗽不止至誕  
日諸子及孫爲壽猶懽飲席半覺少倦入內偃息踰  
日卒公字東甫岱陽其號恭人長公二歲生十一月  
十一日卒時年四十八公事文安公及夏夫人傳恭  
人無忤色然先意於承歡期聚百順則恭人力居多  
公初以秩滿後再遇 覃恩恭人皆宜受封其不得

封則以傳恭人生存厭於夏夫人也教諸子鮮假借  
嚴於公公心折恭人之能甚賓恭人繼娶於劉則受  
命而已劉恭人蓋山陰劉公坤女公初艱於子取母  
弟膳部公女爲女寔余姊女已而謝恭人生二子側  
室王生二子一女劉恭人生一子共五子二女乃更  
多也謝生者胤禎太學生娶庠生孫公汝寅女繼化  
州吏目吳公一龍女胤初舉人出後于伯父中舍公  
娶舉人邵公主女王生者胤祿娶余兄滁州知州義  
峰公女胤祥聘邯鄲縣知縣徐公廷蘭女劉生者胤  
裕未聘長女適編修史公鈞子太學生記文次許福



建僉事邵公夢弼子之鼎孫男七禎生默成熙成杰  
成蕪成庶成祿生日成月成默成聘余內兄子庠生  
胡前純女餘尚幼女一而初亦生男四以成玉成司  
成武成以成聘太學生邵公欽順女玉成娶御史楊  
公宏科女女二長許余兄子舉人如沚子應楫孫男  
女共十四人本支繁衍矣己亥十二月 日公卽  
幽宅與謝恭人合銘曰

相國有子令儀是似吁石阡公抱質玄同 相國德  
厚公亦藏垢相國量洪公亦有容雖朱其轂聊沉於  
陸日飲無何大善若谷恭人有恒持家以盈桐內秉

程子孫繩繩石椁偕歸公所自營維呂翰邦厥澤維

厖



建命事邵公慶彌子之異孫男七積生默成熙成杰  
 成無成庶成祿生日成月成默成聘余肉兒子座坐  
 胡前純女餘尚幼女一而初亦生男四以成玉成尚  
 成武成以成聘太學生邵公欽順女玉成娶御史楊  
 公宏科女女二長許余兄子舉人如証子應揖孫男  
 女共十四人本支繁衍矣已亥十二月 日公歸

幽宅與謝人合銘曰

相國有子令儀是似牙石千公抱負文同

賦公亦藏相國量洪亦有容雖未其較耶沈於

蘇子經縣縣下孰背體公汎自營縣呂傳泯烈擊縣

封文林郎江西吉安府安福縣知縣南望倪公

墓誌銘

上虞著姓曰橫山倪氏宋南渡時兄弟二人爾及孩  
 自青州徙吳興寶文閣學士倪文節思即爾仲子也  
 而孩判我紹興因家上虞之賀溪孩子忠乃又徙橫  
 山云後五世曰文質當元時募義兵禦寇有功為防  
 禦千戶子彥中仍嗣職鄉人重焉彥中子春 國初  
 以賢良徵不赴春少子述初景泰時輸粟三千石賑  
 饑臨山築城又助白金二千兩 朝廷義之賜璽書  
 束帛授徵仕郎不仕述初生晏晏生堂皆布衣能文



堂生鎧領正德庚午鄉薦歷官南城知縣有高行祀於學宮娶徐孺人嘉靖甲申六月二十三日生倪公公諱應蘄字鍾甫幼有成人志端重不爲嬉戲望見長者必正立拱手過乃已塾師授之書誦不輟聲年十六從師於隣梁氏每讀必丙夜南城公患之戒昏後無以食徃公夜餓不能忍則起步或屏息少頃輒復讀久之不復知餓矣梁氏有男子強死已復數婦人死同業者去公獨居夜中恠風起聲徹窓內公啟戶出見光熒熒百餘點飛度如螢如燈離合不常公倚樹望之至鷄三號光盡滅乃寢卒不懼聞者壯之

年二十以毛詩首髦士應秋試已又就山陰故學憲蕭公鳴鳳學焉善問又工經義蕭公大器之會晉江大司寇黃恭肅公分守浙東都試士取公冠九庠名益起自後小試輒居前遠近聞者皆來學稱南望先生晝與生徒講經術夜則偶短檠而讀不異梁氏時又不欲苦諸奴夜漏下十刻閉門卽令休息凡鄙事皆身親之冬復不爐坐久雙足僵不可動始就枕至曉足未溫也卽已起讀矣治經有餘力復旁及百氏嘗摘其粹者手錄爲帙所著述甚富年甫三十餘有五男子深凍涑渠涑旣而六試不第則以經授諸子



深凍皆諸生有名年五十一萬曆甲戌凍登進士除  
安福知縣將奉公往公以二幼子學未成留教之第  
令配陳孺人往五十五受令封後三年凍遷松江府  
同知凍治行尤異宜入臺省外轉爲劣時陳孺人已  
歸公訝曰何至是孺人曰時相銜劉御史而相客某  
廬陵人亦爲御史囑奸民謝燿誣奏劉兒聞之卽遣  
書某止其事某奪於義強諭燿歸而兒復捕燿箠笞  
之想爲此耳公曰大善是且踰臺省數倍矣可觴我  
卽連舉大白十餘因從往松江旣而燿奏竟行劉君  
坐戍潯州公得其獄辭讀之中有倚籍故令凍等語

曰禍未已也無何媚相者復撫安福他事無所得則  
誣凍以贖鍰不及格鑄三級謫山西照磨仍擢同安  
知縣公從往同安一日凍詣府昏時門者驚傳曰秀  
才葉日新反城中巨室皆挈家走矣公曰今吏治清  
民方樂業夫安有反者此妄傳也安寢如常比未且  
凍已自府中召日新慰諭之走者悉歸矣日新後竟  
獲罪然實無反謀公智識過人如此六十一從凍宦  
南兵部後四年凍守撫州又徙淮安公從往淮安踰  
二年陳孺人卒凍歸服闋補荊州公不往未半載凍  
中無妄語罷歸公見第曰汝何以報故相故相卽嚮



銜劉御史波及凍者荊州人也凍曰不趨其勢寧修其怨公曰此我志也是時公七十二矣深老明經閭志尚不衰渠入太學凍亦在邑庠惟涑早卒而凍奉公居郡城時具觴爲樂亦閒出郊縱千巖萬壑之觀興至輒爲詩有陶韋調然不甚刻意也公素有痰疾萬曆戊戌十一月七日疾作深渠凍皆自橫山來十三日公卒年七十五公事親孝每侍側必柔色以溫之定省禮非病未嘗廢南城公病疽衣不解帶者百餘日親口吮之母徐九十乃終猶涕泣不已兄曰養拙公應科弟曰少原公應朝公敬兄而友弟養拙公

岸袒坐公侍立不倦家事一聽養拙公養拙公常病足痛痛潰帛裹之負暄簷間公問疾養拙公舉足公卽爲解帛以巾拭血手傳藥仍帛裹之掖歸寢養拙公卒子蕩衆或侮之公力左右之晚與少原公同居子凍已有祿所奉鮮必與其食少原公又先逝公貽凍書曰弟未立汝善視之生平酷好書旣棄舉子業尤勤雜著有杜谷錄不自棄稿同安有閩遊日抄留都有秣陵隨筆歸自淮陰年七十高矣猶日取舊籍竄定之分合補綴錐痕積案間唇齒皆墨諸子或請曰大人疲於此矣何不棄去公曰未疲也方瘳其腴



復諫也爲人尚實行壯時矜莊謹尺寸人畏其巖立  
晚歲稍和易然迄無惰容務敦長厚有頌善無刺惡  
娶來安縣訓導崇祀名宦陳公維岳女 封孺人五  
男及一女皆陳孺人出女亦早卒孫男十三人入庠  
者四孫女三人曾孫男四人萬曆癸卯十一月初八  
日與陳孺人合葬於邑西白馬湖之 山銘曰  
少年矯矯手青編以老有子傳經龍章晚膺三楚載  
其聲其收未羸來者方日增增賁幽城 深娶柳營  
江巡檢陸宸女涑娶庠生曹正女封孺人涑聘周時

女未娶卒渠娶陳邦道阮端龍女涑娶王汝正俞竟  
女女字賈逢元未嫁卒深生四子文燿娶京衛經歷  
方志化女文煥娶潘斯達女文燦娶清流縣主簿趙  
焯女文熺未聘燠燦皆庠生涑生四子元璞聘兵部  
貢外郎陶公允宜禮部尚書羅文懿公萬化臨山衛  
指揮陳君森女今娶太學生鄭一鳳女元璐聘廣東  
提學副使朱公燮元女天今聘山西左布政使鄒公  
學柱女元瓚聘應天府經歷葉君雲禎女元瑞幼渠  
生二子元瑀聘庠生徐如金女元理聘南城吏目陸  
君廷恩女涑生三子元珂娶光祿監事陳君文會女



元珙聘庠生賈逢泰女皆庠生元昌幼凍生三女字  
太常少卿朱公敬循子貞元御史徐公大化子禹英  
一幼文燿生璧基堅文煥生鑾

廣西按察副使錢公配嚴恭人墓誌銘

觀察錢公益撰有嚴恭人傳云嚴恭人者錢公配也  
恭人後觀察九年卒而前此當生存時觀察爲作傳  
曰爲後嗣訓遠近傳之恭人與錢公俱仁和人父處  
士登母應繼虞而處士大父恭永樂中起進士爲御  
史有從子裕爲給事中兩公同時著直節後御史歷  
官貴州參政給事中至四川按察使皆以榮名終今  
載郡志應孺人感異夢生恭人歿時語處士曰必擇  
所歸處士然之默求佳士一日遇錢公於某氏所錢  
公方爲諸生有名詢之云未受室遂以恭人室焉年



十九歸錢公於時錢公二十有五矣踰三年錢公領  
鄉薦又七年成進士自刑部主事徙兵部余恭入久  
棄世獨封公在養封公老思歸錢公請於朝扶之  
歸踰年封公趣錢公仕錢公難之恭人曰君第往妾  
請留事舅恭人痛弗及事姑氏則竭孝敬奉舅自食  
貧時以拮据具朝夕至是稍有餘祿則益備物封公  
好爲歡恭人每勤治具嘗招客飲封公與客醉歌呼  
相酬款洽矣猶私問封君曰舅大人樂乎今宜以何  
品進念曾子尚問元有亡慮加籩不至或怯歡也封  
公病尤殷勤醫藥食飲及卒則痛泣曰恨不及持夫

子之無行也時錢公在工部比服闋起原官歷郎中  
出知太平府恭人不問外謹管籥兢兢治內如昔時  
又四年錢公擢廣西按察副使不以恭人隨甫三月  
以疾致仕時開府主勦寨議錢公弗善故稱疾恭人  
若弗聞第迎公謂曰瘴鄉歸固善則治酒食佐錢公  
歡如昔封公時度景物佳不待命鮮醲已備錢公縱  
所如靡有空乏然食指漸繁每存樽節不令錢公樂  
減亦不使產落如此者十年已而錢公搆危疾累數  
月不愈恭人晝夜周旋不少倦竟愈錢公有從父靜  
安公又寡嫂馮寡姊適陳皆貧無子錢公欲迎之來



未及言恭人卽請曰願迎來遂衣食之終身且爲治  
後事無缺錢公諱立字守禮萬曆癸巳卒長子養薰  
巳丑進士任工部主事次子養庶辛卯舉人次子養  
度邑庠生恭人痛錢公哀毀欲絕諸君勸之乃稍強  
食巳長公起爲吏部主事晉員外郎以不能取容當  
世與諸銓司知名者同罷恭人曰居官自汝事我何  
問獨幸今來猶可娛我老恭人自觀察公卒後益敦  
儉素華綺多弛弗御諸女及子婦遵其教無敢以奇  
服見者有加簋輒曰寧忘麥飯時耶問之諸母蓋初  
歸時家弗裕錢公館穀他所恭人悉以甘毳進封君

而躬自炊麥飯雜菜菹進之卽觀察公亦弗知故傳  
中不載恭人萬曆壬寅十二月二十日卒距生嘉靖  
丁酉七月十日得年六十有六隆慶改元封安人萬  
曆五年晉今封嗟乎世人但徼一官孰有不揚其母  
德者哉然內德不踰梱雖頌之軼桓孟人弗信也語  
曰知臣莫如主知子莫若父嘗有賢名滿閭里者至  
問其良人輒顰蹙飾枝辭以對悲夫茲其故蓋難言  
之矣席夫子業攘其德乘以鬪其捷譬之孟嘗君名  
高其主主擁虛矣名在外者也善乎蔡儀部狀恭人  
也曰無梱外名是婦德之務內修者乎是其志期無



違于夫子已矣夫夫婦至暱然此兩人者有過非無過譽也錢公吾鄉賢大夫其言充足重云顧飯麥事錢公卒弗知有遺德矣按狀恭人蓋生四男四女養庶娶福建副使黃公應奎女養庶娶光祿少卿吳公果女養克天養度今入太學娶河南副使潘公頤龍女長女適處士蔣公大忠子志學次女適上猶知縣馮公有翼子庠生貢次二女天孫男六養庶生汝志聘御史秦公懋義女養庶生德昌聘南刑部主事翁公汝進女養度生汝懋聘太學周公大賚女汝念汝愈汝慈尚幼孫女十三養庶生七適太學張公懋倫

子庠生燁然舉人張公梠子庠生穆然字官生江公世卿子庠生元禧兵部主事沈公光祥子希夔光祿署丞湯公彬子之彥福建副使包公應登子胤長一未字養庶生三適舉人周公大毅子庠生佑嘉字錦衣千戶宋公守一子楚望東筦知縣翁公汝遇子開之養度生三字貢生金公世行子兆奎舉人虞公允中子亮寅一未字恭人於 年 月 日從觀察公葬於邑西之仁壽山銘曰

恭人名德之後作賢大夫偶善事其舅食豐以壽是克艱於婦觀察志無負偕好白首八子一母孫男女



十九植根也厚其枝蔭千畝夫子德相友同穴高阜  
傳存不久

于配周張兩孺人墓誌銘

李獻吉激烈好義士也於私愛若無櫻者然痛內子  
獨弗克割焉今于元時亦然夫豈果有足鍾情者乎  
抑二子之厚於倫耶周孺人武進人總督漕運右副  
都御史周公某孫女父某張孺人元時同邑人雲南  
知府張公祥為女弟父某于者金壇右族元時名孔  
兼萬曆庚辰進士初授九江推官擢主客主事歷儀  
制郎中以言事謫安吉判官祖撫治鄖陽右副都御  
史贈右都御史諱湛父舉人贈戶部主事諱未元時  
年十八婚於周踰三年生子順孫後二年卒子殤二



十四婚於張踰年生子安孫無何亦殤斯元時之所  
爲痛者也然張猶產一女且作配四十二年視周稍  
勝矣元時今共有五子六女蓋側室者四齊生玉全  
喬生玉瑞玉理玉班玉珩全瑞理俱庠生一女莊出  
一喬出又三俱王出元時狀稱張孺人克喪兩尊人  
虔周時祀鞠育衆子女食餌組紉靡不手勤也賢哉  
賢哉然內行不踰梱惟良人知之卽虛美曷核焉惟  
身在也而庶生子女林立斯樛木螽斯之德徵矣夫  
婦性類知恭舅姑惟逮下爲難語曰不知其人視其  
所使今難者有實知所稱易者非虛也賢哉賢哉

周孺人作配止四載又半在牀蓐元時謂懿行掩於  
蓬蒿茲其所尤痛心者乎獻吉先生甚痛左宜人至  
賦結腸之篇然左止一子枝不聞有庶則德大遜張  
矣李于俱以直諫謫左值 覃恩兩沐封元時雖任  
禮部久以六七不同封故兩孺人祇受節推 封頃  
東宮遲留時元時在儀司爭甚力會謫去不終所  
事比 冊立行則元時在外僚不霑 恩矣然元時  
大業未竟將來有 崇封焉何論五品耶全娶江西  
按察使賀公邦泰女冊陽人瑞娶禮部尚書周文恪  
公子義男某女無錫人理娶左贊善顧公紹芳女崑



山人班娶吏部左侍郎趙公用賢女珩聘太常卿顧公雲程女俱常熟人張孺人女適江西右叅政丹陽姜公士昌莊女適長洲諸生王景皋喬女適宜興諸生吳洪亮王女適溧陽史致廕許聘宜興吳善慶一未受聘禮部尚書寶御史有功禮部主事正志錦衣指揮繼書其父也光祿署丞驛則大父也全生鑽鏗瑞生鑰錡錫凡五孫男三孫女鑰聘於武進薛鑽聘於宜興吳鏗聘於武進龔薛父名敷政舉人吳父名達德光祿署丞龔父名道立江西右叅政周孺人生嘉靖丁酉九月二十八日卒庚申正月二十八日壽

二十四張孺人生嘉靖丙申七月二十七日卒萬曆癸卯十一月十一日壽六十八乙巳十月十三日葬邑之龍山新阡石槨中三今虛左焉銘曰  
五男子六女如出一母邈美于先乃知母有前前德弗彰其悲乃長駢懿嗣徽于胤用昌吁彼四孺主孟是步今各母其子何拊何哺夫猶嫡氏慕刑家翩翩以直諫遭諸孫遶前焉不配賢左穴虛以延繫孺人阡



居業次編跋

胤筠藉祖父遺業家藏

賜本頗饒時出簡編亦多購致自惟  
蹇拙不能肆志於文章然竊竊焉  
臆上下千古欲縱觀作者之盛也私  
心所服膺者於周得左氏韓子於  
秦得吾家相國於漢得子長孟堅



二先生於唐得韓柳於宋得歐蘇  
我

朝人文蔚起才俊遽興前得北地李  
先生關西王先生後得婁江王先  
生新安汪先生鼓篋緡誦泱泱乎  
大風也哉間嘗思之古人各擅獨  
詣諸名家亦僅有偏長鳧頸鶴脰  
不無所恨未有包括秦漢度越後  
賢極鑪錘之妙成條理之始終而  
卓乎操大業之柄如我

師孫先生者也先生峻望弘猷益光  
前烈篤生也晚亦聞薦紳所頌說  
先生開文運於南宮樹清標於鄉  
寺警倭虜於遼海弭奸宄於留都



海內莫不想望丰采冀其均四海  
而弼

一人亟矣又聞讀書嗜古篤於天性  
諸生時檢習周以前書一出而冠  
天下翹翔紛署間與毘陵唐玄卿  
先生古鄞余君房先生揚摧結撰  
如埴合篋卽戎馬倥傯之候抽思

握管矻矻不少置也暇則評閱群  
書必手自丹鉛之蠅頭小楷歷歷  
簡端如燦錦迄今不少衰此寧惟  
公卿大夫怠不能爲卽夙學勤敏  
之儒及茲年齒亦耗不能習也嗚  
呼異哉

昭代文集紛沓莫敢以意進退之者



先生毅然以衡量爲任躬自遴選  
寧佚無溢復與唐余二先生叅訂  
再三以備今文之槩宜令蕭氏不  
得專美於前真盛事也每搆一文  
覃思閣上义而後出大都遡源六  
經茹精左韓而馳騁於史漢之途  
無不有也亦無一有也玄工肖物

各曰其質所自賦而無容心焉故  
嘗取韓柳以下擬先生之文而竒  
者未雅鬯者未鍊質者不葩迹者  
不神曾無足當先生一映而又何  
以擬先生萬一哉先是丁酉歲伯  
兄叅藩公乞先生初定文曰居業  
行於世後起才豪奉爲型式今又



十五年矣

筠

幸侍先生函丈日叩

玄亭問字辱提誨獨殷乃偕大侄  
勤之乞居業次編以歸其經略叅  
贊諸疏獨不存豈吉大臣削諫草  
意乎讀次編數過竊相謂曰大而  
化矣不能贊一辭矣吾兩人私而  
秘帷中曷若公而寶於天下遂僭

爲梓校以續行於世先生尚欲儲  
之以俟異日茲刻非先生指也勤  
之曰今春先生七十壽矣天下望  
後刻已久第以次編行之何不可  
更十年而爲三編更十年而爲四  
編吾黨且執筆而進夫齊太公之  
丹書以八十衛武公抑之篇以九



十隨時續之固未艾也筠然其言  
謹拜手齋沐而紀歲月於篇末  
萬曆玄默困敦之歲闕逢執徐之月  
修禊之日門人呂胤筠百頓首書  
於小淇園松風閣中





